



29. ramazan 1446 h.g.
29. mart 2025 god.

BAJRAMSKA PORUKA I ČESTITKA

Gl. imam MIZ Zvornik, hfz. Izet ef. Salkanović

U ime Allaha, Milostivog, Samilosnog

Hvala i zahvala pripadaju Uzvišenom Allahu, Gospodaru svih svjetova, koji nam je podario mjesec Ramazan- mjesec posta, ibadeta, dove i milosti. Njemu Uzvišenom se zahvaljujemo na svakom stanju!

Poštovana braćo i cijenjene sestre, dragi vjernici....

U subotu, 29. marta 2025.godine, sa akšam-namazom završava mubarek mjesec Ramazan. Prema Takvimu Rijaseta IZ u BiH, 1.ševval 1446 godine po hidžri, odnosno prvi dan Ramazanskog bajrama je u nedjelju, 30. marta 2025.godine.

Kroz ramazanske dane i noći, imali smo priliku približiti se našem Stvoritelju, osjetiti snagu vjere i ustrajnosti, te učiniti naša srca mekšim kroz dobročinstvo, sadaku i brigu za one kojima je pomoć potrebna.

Ramazan nas je naučio strpljenju i bogobožnosti, podsjetio nas na važnost zajedništva i međusobnog pomaganja. Ramazan je mjesec u kojem se srca otvaraju, ruke pružaju i u kojem se duše pročišćavaju. Zato, neka nam ovi blagoslovljeni dani budu podsjetnik da vrijednosti koje smo usvojili u ramazanu nastavimo živjeti tokom cijele godine.

Bajram je kruna ramazanskih ibadeta, dan nagrade i radosti. To je prilika da sa svojim porodicama, prijateljima i komšijama podjelimo sreću, da posjetimo rodbinu, iskažemo poštovanje prema starijima i obradujemo one kojima je radost potrebna. Bajram nas poziva na oprost, na jačanje porodičnih i prijateljskih veza, te na nastavak činjenja dobra u našim zajednicama.

Pozivam Vas da ove mubarek dane dočekamo sa radošću u srcima, sa zahvalnošću prema Allahu i s dovom da nam podari dobro na ovom i budućem svijetu. Neka bajram bude prilika za međusobno zbližavanje, za mir i blagostanje u našim domovima i našoj domovini.

Bajram-namaz na području MIZ Zvornik će se klanjati na 38 mjesta. Vrijeme klanjanja bajram-namaza je u 07:09, a sabah-namaz u našim džamijama će se klanjatu u 06:00 h.

Drugi dan Ramazanskog Bajrama obilježavamo kao Dan šehida, sjećajući se onih koji su dali svoje živote braneći vjeru, domovinu, čast i slobodu. Njihova žrtva je ugrađena u temelje naše slobode, a njihova imena upisana su u sjećanja svih nas.

Naša obaveza je da čuvamo sjećanje na šehide, ali i da budemo dostojni njihovog emaneta-slobode, vjere i zajedništva. Njihova žrtva nas obavezuje da budemo bolji ljudi, odgovorni prema svojoj vjeri, porodici i zajednici.

Centralna manifestacija u povodu Dana šehida za područje MIZ Zvornik će biti upriličena u MC "Gornja Kalesija" u 9:00h, drugi dan bajrama.

Svim muslimanima širom svijeta, a posebno džematlijama sa područja našeg Medžlisa, općine Sapna i Grada Zvornika, u Domovini i Dijaspori, u ime MIZ Zvornik i u svoje lično ime, želim sretan i mubarek ramazanski bajram, uz dovu da nam Uzvišeni Allah podari zdravlje, bereket i uputu.

BAJRAM ŠERIF MUBAREK OLSUN

Zvornik, 29.03.2025.